



Tarzsius Caviezel (pld, Tavau) (a san.) aveva inoltrà l'incumbensa che ha manà a la revisiun da la lescha chantunala da sustegn.

FOTO O.ITEM

Tuttas vischnancas duajan gidar a pajar

Il cussegl grond decida la repartiziun solidarica sin tut las vischnancas

■ (anr/abc) **Ier en damaun ha il cussegl grond tractà la revisiun parziala da la lescha chantunala da sustegn. Il parlament è suandà cun 116 gea cunter 0 na ed ina abstenziun la proposta da la cumissiun e cunquai approvà l'incumbensa da Tarzsius Caviezel (pld, Tavau).** «Il chantun è sa mussà fitg fair cun nus. Ussa duessan nus er esser fairs cun el», ha ditg la commembra da la cumissiun chantunala per sanadad e socialesser, *Claudia Troncana* (pld, Silvaplana) tar la debatta d'entrada. En connex cun la revisiun parziala da la lescha chantunala da sustegn ha ella, ensemen cun la presidenta da la cumissiun *Christina Bucher-Brini* (ps, Cuira) ed auters commembers stuì defender la proposta d'ina maiortad. Ils 29 da zercladur 2016 aveva la cumissiun decidì cun nov cunter duas vuschs da proponer al cussegl grond ina midada da la lescha chantunala da sustegn, quai cun introducir il nov artigel 5a. I va per ils custs ch'ils requirents d'asil minorens betg accompagnads chaschunan.

Il chantun vegn distgargià

Confederaziun e chantun portan tut ils custs dals fugitivs durant lur procedura per la dumonda d'asil. Cura ch'els vegnan reconuschids e retschaivan la lubientscha B va la responsabladad finanziaza vi a las vischnancas da domicil da las chasas nua ch'ils minorens abiteschan. La regulaziun che la cumissiun ha proponì evitescha per

l'ina grevezzas unilateralas da vischnancas cun blers fugitivs e tegn per l'autra quint al fatg che l'assistenza ed il sustegn da fugitivs èn en la cumpetenzza da las vischnancas.

Pir dacurt hajan parlament e pievel decidì la regulaziun definitiva cun la gulivaziun da finanzas ed ussa veglia il chantun sa distgargiar da sia cumpetenzza, han las duas commembras *Elita Florin-Caluori* (pcd, Panaduz) ed *Angela Casanova-Maron* (pld, Domat) declerà en lur posiziuns cunter la maiortad da la cumissiun. Cun sustegn da *Beatrice Baselgia* (ps, Domat) han ellas battì per lur arguments ed empruvà da persvader il parlament tar la debatta d'entrada. Sco argument principal han ellas ditg che la regulaziun proponida distgargia il chantun per in mez milliun francs, uschia mitschia quel da sia obligaziun fixada en la nova gulivaziun da finanzas. La revisiun parziala pertutga da princip sulet il surpli da custs che n'èn betg cuvrids cun las contribuziuns federalas. Perquai dovri il nov artigel 5a che reglescha la repartiziun diils custs.

Liquidà l'incumbensa Caviezel

Claudia Troncana e *Hans Geisseler* (pcd, Tschintg Vitgs) sco era *Bernhard Niggli* (pbd, Crusch/Grüsch) han declerà ch'i giaja per la solidaritad cun il chantun. Pli navant duajan ins distgargiar las vischnancas cun centers per fugitivs. Tuttas vischnancas grischunas duajan purtar ils custs restants per fugitivs minorens. I sa

tracta d'ina summa annuala da 2,91 milliuns francs che tuttas 114 vischnancas grischunas duajan purtar. Senza la midada purtassan be singulas la chargia, quai èn radund 30 vischnancas cun centers nua che minorens reconuschids abitan.

Christine Bucher-Brini ha rendì attent al concept cumplessiv che l'Uffizi chantunala da migraziun ha elavurà per accompagnar, sustegnair ed assister ils requirents minorens che la confederaziun reparta al Grischun. «Nus essan pronti da sorprender responsabladad», aveva *Elita Florin* ditg tar la debatta d'entrada. Quella responsabladad ha il cussegl grond vulì accentuar. Cun 116 cunter 0 vuschs ed ina abstenziun ha el approvà la revisiun parziala da la lescha chantunala da sustegn. Da la vart operativa duai il concept elavurà bastar per optimar las mesiras per sustegnair ed assister ils fugitivs minorens betg accompagnads. Cun 66 gea cunter 43 na e nov abstenziuns ha il parlament decidì consequent da liquidar l'incumbensa *Tarzsius Caviezel* (pld, Tavau). Avant questa votaziun eran *Elisabeth Manti* (pbd, Tavau) e *Sandra Locher* (ps, Cuira) sa defendidas senza success cunter questa finamira. Il concept elavurà na basta anc betg per assister, accompagnar e sustegnair cumplessiv er ils requirents minorens senza status da fugitiv reconuschì. Il parlament è suandà ils arguments da la regenza. Tenor quella basta il concept elavurà per integrar ils uffants e juvenils.